

重修兩淮鹽法志

兩淮鹽法志卷七十二

督銷門

循環給運

綱法敝而票行票法窮而綱復亦事理之必然者也攷
同治四五年閒請運極旺引票不能徧給於是始參綱
法於票法之中立循環法初行於淮南踵行於淮北以
舊商爲主而不易新商商有世業則官有責成意美法
良故能維持於不敝迨其後新引增入循環稍滯矣然
廿年成效已著宜備書焉志循環給運

同治四年十一月湖南督銷局鹽法長寶道翁同爵等詳

奉鹽政函諭揚州招商局掛號空占居多以致備資遠
來之商坐耗用費可全歸湖南督銷局掛號按引收資
可無空占及缺引諸弊等因復批變通輪運章程一案
嗣後在湘認運如何歸併掣籤或統歸湖南督銷局招
商並速會議伏思向來兩淮鹽務銷數以湖南爲較多
引地亦以湖南爲最遠揚州地處下游江湖阻隔聲息
難通有鞭長莫及之勢從前湘鄂並爲楚岸此次重整
淮綱曾爵督部堂特立湘岸名目於湖南另設一局蓋
深知兩淮盛衰之本係於湖南商情體察之真不欲以
揚州遙制並不欲以鄂岸兼綜也招商之舉專爲辦運

而設顧督銷與督運事若分爲兩途實則相爲表裏溯查淮綱敗壞引地遂被鄰私侵占逆氛梗塞之時固所不計迨後江路肅清而資本較厚慣運鄰私之人明知淮引已通仍爭趨川粵者非甘冒私販之名也私販來湘在川粵視之皆係溢銷之引請運旣無定規受載不拘定所赴場逕運聽之在途接運亦聽之不但運本旣至無守候之虞即使運本未至亦可通融借貸售價之後始清鹽本若揚州請運淮引則挂號見遺於額滿資本旣至不能改圖就令有號可挂而籤掣在後輪運無期招商章程不時更易前請預納釐金已與刊章減輕

成本之意相違近日訛言繁興更有勒派商捐之說人心惶惑一日數驚視川粵販私之難易相去不啻天壤歐編修到湘談悉輪運情形據稱本年夏間預雇湘船前往各商坐耗之費萬不能不虧折成本廢然思返者實不乏人若不變通辦理勢必盡驅湘岸之淮商悉變而爲川粵之私販淮引何由振興引地何由收復查湘鹽運商籍隸湖南者十居八九運本皆自湘而往他省請運之商十中不及一二而所辦本年冬夏兩綱之鹽勢將陸續抵岸輪售之後資本亦全在湖南若挂號全歸督銷局則按引收資撥派師船分批起解護運之中

卽寓驗資之法虛占之號無自而來且成本免兌滙之
煩商情尤爲稱便見在乙丑冬綱號次早經挂滿應請
明定章程卽將湘岸丙寅夏綱招商挂號事件概行歸
併湖南督銷局辦理凡請運湘鹽各商概行在湖南總
局挂號將辦鹽成本呈交到局聽候撥解揚州由湘岸
轉運局給領辦運至於輪運次序夏綱六萬引共有一
百二十號應以三十號爲一起分爲四起俟岸鹽輪銷
將及乙丑冬綱之際卽由湖南督銷局將丙寅夏綱頭
起商本派撥師船妥爲護解以後均按四十五日撥解
一次夏綱運本以六箇月解完爲度淮引接續而來運

本接續而往轆轤周轉在岸無脫檔之慮在場無擠運之虞空號缺引諸弊皆可不禁而自絕法無便於此者經署鹽政李鴻章批查南鹽請運踴躍額少商多不得已而定驗資減折掣籤之法皆有流弊湘岸運道更遠商販赴揚挂號攜挾重資千里跋涉往往因額滿而不得片引實有進退維谷之苦而認引各販中真實辦運者固不乏人其夤緣空號希圖轉賣漁利之弊仍難保其必無本署部堂正思將認引之事歸併督銷局俾商販售出前檔之鹽接請後檔之引轆轤轉輪以垂久遠茲閱該道等所議辦法與本署部堂意見適相脗合所

有湘岸來年應開夏綱認引事宜准歸該道經理至各商在督銷局請引之後令將辦鹽成本繳局由局撥派礮船分起解往揚州轉運局給領辦運誠如來詳空號之弊不禁自絕尤爲得法惟目前鹽利甚厚誠恐他販聞風紛紛全赴該局請引則所定一百二十號不敷分給又有擁擠之患本署部堂細加斟酌見在湘岸辦運之商已逾兩綱之多不必另再招商認運應卽就已認之販循環給運各商在督銷局售出一號之鹽令其將原請花名續認一號之引積有一二十號卽可咨送揚州辦運其已認各商如有事故不願續運方准由局另

招補數如此定立限制銷暢則運暢銷滯則運滯不特無脫檔擠運之虞且可免溢額缺引之慮仰卽遵照候札淮運司楚鹽招商局查照再商人請運時每引預納釐金一兩仍應照舊收納此項應全解金陵充餉

同治五年正月署鹽政李鴻章札照得本署部堂前定循環給運章程刊刷通行原爲永保鹺綱亦因軍需緊要冀收預釐報效銀兩專供剿捻急需旋據運司以循環給運爲日甚長利益正無窮盡詳令各販呈繳捐項核定鄂岸每引捐銀六錢湘岸每引捐銀五錢西岸每引捐銀一兩四錢皖岸每引捐銀一兩已據各販陸續在

揚捐繳其有運鹽赴岸之販報明由督銷局收捐

同治五年正月鹽政李鴻章批湖南督銷局詳據詳商販
前赴該局請引數月以來已逾百二十號本署部堂前
批早經慮及所定號數不敷分給又有擁擠之慮惟其
中既有成本業經運揚或已繳局者若概不准運固未
免有拂商情且鄂岸已將丙寅上下兩綱一並認足預
行存記湘岸僅開至乙丑爲止辦理亦未畫一本署部
堂復加酌核湘岸本年夏綱六萬引應如所詳先將已
經繳資赴揚及收銀未曾起解者提前挂號其餘概令
繳清成本預納每引釐金一兩准其一律挂號由該道

等會同鹽道衙門籤掣先後分批給咨領運但夏綱只有六萬引而請數已逾百二十票仍有向隅之戶並准仿照鄂岸將冬綱六萬引一並收釐掣籤存記仍俟給咨時再令繳本總以認足本年十二萬引爲度此外不准再招必須遵照前批循環給運所收預釐十二萬兩應解金陵充餉並將現認商名引數並掣定名次開冊詳報該局擬刊章程務須稟候核定再刊以昭鄭重再前據該局具詳保合公等所請之引業經批准給運應歸本年十二萬引額內統算至循環給運一層應自乙丑冬綱六萬引爲始其從前請運者一概不准牽扯

同治五年三月署鹽政李鴻章劄淮南新章初定時誠恐
商販請運未能踴躍是以設立楚西兩招商局以廣招
徠現在鄂西兩岸引額皆已認定湘岸認運事宜亦已
歸併督銷局嗣後各岸引鹽皆應就已認之販酌予循
環給運毋庸再招多商應將楚西兩招商局一併裁撤
統交運司經理以一事權而專責成應發護照艙單向
用招商局關防者改用淮南總局關防卽由總局隨時
填給所有招商局用每引一錢八分全可節省應卽提
充軍餉其原設委員應裁應留統歸運司妥酌具稟所
需薪水役食爲數無多改在運庫經費項下支給

同治五年九月署鹽政李鴻章刊發鄂湘西皖循環給運章程 第一條酌定循環引額淮南引鹽經曾爵閣督部堂刊頒新章請運日旺額少商多每值開綱紛紛認運至數十萬引之多不得已而掣籤減折於商情諸多不便現於票法之中參用綱法卽就已認之販循環給運鄂岸以丙寅春秋兩綱十二萬引湘岸以乙丑秋綱運鄂岸以丙寅春秋兩綱十二萬引湘岸以乙丑秋綱丙寅春綱十二萬引西岸以丙寅春秋兩綱丁卯春綱十五萬引皖岸以乙丑秋綱丙寅春綱七萬二千引爲定額如鄂岸售出丙寅春綱一票之鹽卽給丁卯春綱一票之引他岸照此遞推均以原請花名接認後運不

願者稟退犯規者扣除仍由運司暨督銷各局另招補數儻無稟退扣除之引毋庸另再招商以示限制 第二條完納預釐報效各岸鹽釐初定章時本係全數緩俟售鹽後完繳旋因獲利豐盈商情踴躍酌定鄂湘兩岸每引預完鹽釐一兩西岸每引預完鹽釐二兩皖岸定章本應先繳報效每引一兩九錢此次循環給運應由商販在於各督銷局將每票應繳預釐報效照章完納始准給發咨文接辦後運其各局所收預釐報效銀兩按月報明統解金陵充餉 第三條領咨投局掛號商販在岸請有續運咨文應赴揚州淮南總局將咨文

呈繳並將原定都營賞號改爲安定梅花兩書院經費
每引四分八釐照數完納總局收清後卽按咨內商名
引數登簿挂號按月開摺報明本部堂及兩淮運司查
考將來買鹽之次第旣以挂號之先後爲斷其應繳局
用鄂湘西仍俟運鹽時皖岸仍俟售鹽後照數完繳以
符舊章 第四條酌發買單運鹽商販買鹽本應挨次
給單此次循環之引若領咨到揚卽准買運則前此已
認各綱各岸皆有未運之引同時並買非特瓜棧無鹽
應捆且舊認各販難免爲新認所占壓殊欠平允應俟
各岸認定各前綱將次運竣由運司察看岸局存鹽之

多寡銷數之暢滯隨時酌定飭局給發買單挨次辦運以杜躡越綱分爭先搶買之弊 第五條照單應分綱分淮南引地尙未盡復見辦之鹽儘運儘售本未奏明開綱是以前刊護照等項文件均未註明綱分茲議循環給運以前綱之販接運後綱之鹽雖掣鹽票號均有一定次序而鹽船到岸遲速不齊則售銷卽分先後且請運日久恐滋套搭牽扯之弊應由淮南總局刊刻綱分戳記嗣後發給買單及護照船單核明係何綱之引分別加戳以便稽考 第六條分綱更易的保商販認運向取的保專爲杜絕貽誤課運起見責任匪輕若聽

其永遠作保或有他往事故等情轉致無從著落自應分綱更易按票出結並每人結保至多不得過五票以示限制而昭鄭重

同治六年五月署運司程桓生詳據轉運湘鹽局張令詳稱據湘商平岸兩儀生等稟稱商等籍隸平江自招商開辦淮綱卽遵章領運半載於茲查平江民間沿習向食碱鹽商自赴淮南卽專運碱片嗣以辦運參差有累岸務或擁擠而致滯銷或缺乏而難接濟去年九月奉督鹽部堂核定平江一岸每歲辦運碱片一萬引以商等名數按票分派示諭在案商等遵照陸續領運惟平

岸每年所銷尙不能及一萬引之數商等輓轡轉運兩
綱勻配猶可銷售若再有他商加運必致擁滯而商等
所運碱片又不能行入別岸將來不獨以候輪虧本尤
恐以滯引誤課茲值開辦伊始奉督鹽部堂批示平岸
一萬引先給買單尤見憲慮周詳體恤備至用敢錄案
開具花名懇恩轉詳運憲批示並懇移知岳州轉運局
按照開具花名各票查驗撥入平岸庶無紊亂等情卑
職查該商所稟尙屬實情擬請俯賜批示准予立案等
情署司查平岸專銷碱鹽前奉核定每年一萬引今據
該商等承運二十票自應准其專售他商不得援請以

免擁滯理合詳祈鑒核轉飭湖南督銷局及岳州轉運局一體遵照辦理經鹽政曾國藩批查平江碱鹽核定每年以二十票爲額循環給運所有的名清冊業經歐編修開送行知湖南督銷局在案此時毋庸重發惟平岸係專運碱鹽且經核定引額自不能再任他商運售仰候札飭湘局遵照再碱鹽一萬引卽在湘綱循環十二萬引之內公生和不便短運一百引應飭補足以符全綱額數

同治八年三月運司方濬頤申竊照鄂湘西皖四岸運商循環額引經前署爵閣督鹽憲李判定章程載明前綱

運竣以原認花名接認後運不願者稟退犯規者扣除
隨時另行招補並分綱易保按票出結於票法之中參
以綱法實爲各商定久遠之規意美法良誠爲至當乃
辦理未久各商販紛紛稟請更名大都先係合本繼思
分夥亦有始用夥名請運後復改歸本商本名者此種
情形更名之後原足以昭核實但其中亦有罔知顧忌
以票牟利旋買旋賣更而又更致有循環之名轉失循
環之實前經核議必須實非賣票情理可原者准於開
綱時取保更名於冊內註明第二次環運不准復請更
易又奉前升憲李札飭凡更名之商祇准於開綱一月

之內稟更遲則一概不准各在案嗣後雖無隨時稟更之案而每逢開綱稟請更名者仍復不少伏思初定循環之時各商販或糾資合運或倩夥出名其更名情節均屬尚有可原茲查鄂岸已環運一次湘岸已環運二次西岸已環運三次皖岸已環運二次其中應行更改各商歷數次環運之後自必早經分晰清楚乃各商仍請更名不已難保無賣票頂替情事竊思環運章程原欲收散漫而歸於齊整由票法而漸復綱規似此每綱必更直以引票爲射利之具因而借票爭控之案層見疊出轉爲商累與循環給運之本旨大相刺謬見在鄂

賢階巧 盾製合軍

嚴行禁止以肅鹺政而安商業經鹽政馬新貽批允
同治十一年十月署鹽政何璟奏伏查北鹺驗貨流弊不
可窮詰前督臣馬新貽與曾國藩妥商停止驗資卽就
舊綱花名准其循環轉運已歷數年販情稱便以後自
宜按綱循環以垂久遠經戶部覆准

光緒五年六月鹽政沈葆楨奏竊臣疊准部咨自甲戌綱
起責令眾商增額八萬道等因當經轉行去後茲據運
司歐陽正墉督同海分司妥議詳請具奏前來臣查增
引爲權鹽之美名新商願之舊商尤願之部臣疊次督
促意在裕

皇太后

國計而復舊章臣責有專司既足以自炫所長又可以取悅於眾何所憚而膠柱鼓瑟惟深味前人立法之意參以近日利鈍情形覺美名僅在目前三五年後恐卽流弊百出且馴致於積重難返之勢謹以見聞所及爲

皇上觀縷陳之商賈之挾重貲以求贏者向皆注意絲茶而近年往往虧折惟票鹽則利微而可操左券故轉爲眾所爭趨然票價愈昂則愈爲可居之奇貨雖重價購之而不可必得非覬覦增引無由驛入其中由是有遊手好閒之徒希冀鑽營得票轉賣漁利捏造商名遞赴運

司分司以及臣衙門百計稟求或以捐賑請或以助餉
請更端嘗試遇事生風所謂新商願之也新商不能屨
入遂疑舊商從中把持殊不知果擬增引舍掣籤別無
他法新商可掣舊商亦可掣新商事事草創獲利猶遲
舊商則因山爲高輕車熟路譬如去年辦百引今年辦
二百引其用費不至於倍之也而獲利則當倍之所謂
舊商尤願之也歷任督臣精鹽政者無過曾國藩稽諸
舊卷每審定一法必舉數十年之利害如身入其中而
歷試之計當時眾商增引之願未有淡於今日而淮北
引額僅畫二十九萬有奇夫豈自便考成置

國課商情於不顧哉。厯考鹽政之壞，胥由額浮於銷，其始設法彌縫，勉符奏銷之限，久乃愈不可收拾。於是新殘套搭之議起，商疲課絀，治絲益棼。未幾而有銃銷融銷之奏，未幾而有帶徵停運之奏。乾隆嘉慶年間，屢犯此病。卽如近日川鹽銷路，可謂極暢，而滯引轉多，稍一清釐，謗聲四起，亦前車之鑒也。商人惟利是視，鮮能深明大體。人多則互相傾軋，有祇圖目前毫髮之利而不惜全局爲之動搖者。今額少則商少，商少則剔弊易於爲力，疏銷亦易於爲功。如到岸之浮費、出場之私蹤，以及重斤廢票等弊，得廉能之吏數人聚精會神以整頓之。

尙不至毫無把握而其顛撲不破者尤在循環一法蓋
能將綱分逐漸提早收裕課之實效而不必居增引之
虛名曾國藩用意至爲深遠就淮北課項而論從前運
鹽四十六萬引徵正稅銀三十一萬餘兩協貼淮南銀
六十七萬餘兩共計徵銀九十八萬餘兩見在每綱徵
正雜課銀三十七萬餘兩五河正陽兩卡鹽釐旺收之
年數逾百萬串以初定章時每兩易錢一千三四百文
計之每年尙不止收銀六十餘萬兩卽極歉之年亦收
釐七八十萬串是引額減運三分之一而課釐並計比
較從前大致相埒况自開辦戊辰綱起至甲戌綱止厯

六年有奇銷足七綱引既溢銷課自暗長若驟加入萬道運多則銷滯銷滯則本擱而運亦不前私梟遂乘機四起往日視爲奇貨可居之票漸至一文不值商不自愛將來私之弊甚於販私而重斤廢票跌價搶售沿途加載無所不用其鬼蜮商不可問而課愈不可問矣嘉慶道光年間常見殷戶願捐巨款以求免商其受病夫豈一朝一夕之故哉况淮北引界與淮南楚岸孝感黃陂等縣及皖北各屬處處毘連北鹽侵南厯年已久道光末年南引停滯皆歸咎於北鹺增額所致見在楚皖邊境設立堵緝北私各卡業已防不勝防萬一淮北因

增引而跌價因跌價而搶售泛濫於犬牙相錯之地南
蹙其何以當之臣博訪周諮通籌全局與其徒博增引
之名致滯銷而滋弊何如恪守已成之法俾月計而有
餘合無仰懇

天恩容臣姑照曾國藩所定章程竭力疏銷務期綱分提前
俾厯綱積引逐漸銷竣再將舊額酌量規復奉

旨戶部知道欽此

謹按淮北額引不增正所以保循環新章故附錄斯
疏其後左宗棠加十六萬引曾國荃仍奏免之

光緒七年十二月鹽政劉坤一奏竊淮南引地至今未復

而恪守循環源源轉運商人尙有什一之獲歷屆所收課釐凡京外緊餉及各路暨本省防勇軍需賴以接濟江南餉源大半取給於此兼能疊次捐輸協濟賑務近又報效鉅款百萬備購鐵甲船之用商情固結成效昭彰固由曾國藩立法之善亦由部臣與歷任鹽政屏除浮議力保定章故能涓滴歸公歷久不敝此後但求慎選賢能始終罔懈再將兩湖引地漸圖規復法不必易轍改絃課自見日新月盛奉

旨戶部知道欽此

光緒九年正月兩江總督左宗棠奏竊淮南引鹽前經臣

奏加鄂湘十五萬引原以稽諸舊額短缺前十數年來
未經規復而新商踴躍爭先捐輸巨款又於

國計不無裨益是以一面奏請加額一面咨商川楚兩省
將久假未歸之引地一律歸還川楚督臣如果不分畛
域復淮引地助淮緝私前次准加之十五萬引暢銷於
荆宜五府一州淮課由此充盈商竈由此繁富乾隆嘉
慶之盛規未始不可復覩於今日乃四川督臣丁寶楨
僅允每月減讓一二百引尙屬空言並非實事湖廣督
臣涂宗瀛一意袒護川鹽爭斷不容少之餉項忘必不
可廢之成規以致引地絲毫未復新鹽無路拓銷商情

畏阻上煩

宸厪其咎固不在增引之驟而在復岸之難也明矣接准部
咨以引地未能全復遽加三百票恐不能按輪銷竣不
若由漸而來新商已繳銀六十萬兩應准加票六十張
儻新商不願承領應令舊商認繳六十萬兩發還新商
等語是臣辦理掣肘情形部臣亦已洞悉茲據兩淮運
司孫翼謀署淮揚海道徐文達具詳新商賀全福等三
十四商以十五萬引減爲三萬引遵章每票繳票費一
萬兩眾商意見參差無力承運稟請退票由司另招股
商和致祥等十五商接辦飭令局員傳同面詢一退一

認皆出情願由和致祥等繳銀六十萬兩歸還賀全福
另給和致祥等循環三萬引以二萬引歸鄂一萬引歸
湘分別綱分按次給運是舊引既不致占礙新票可按
輪售銷商情帖服眾論翕然核與部臣收銀六十萬加
票六十張之議適相符合而賀全福之票既經退出從
前之謠詠紛紜亦已不煩辨論而自解矣惟賀全福等
前次繳捐後經臣奏明一面收銀一面辦運且恐引地
一復到處需鹽長江路遠不能不先行起運此次接到
部文臣卽飭運司於奉文日截數據報運出鹽七十九
票合三萬九千五百引已運之鹽有到岸銷訖者有早

經開江者均祇准一次爲止此後歸和致祥循環轉運
奉

旨戶部知道欽此

謹按楚岸加三萬引以二萬引加鄂一萬引加湘循
環轉運互見加引卷中

光緒九年三月鹽政左宗棠奏再皖岸引票先經臣奏明
增復四萬二千八百二十八引每引收費銀十六兩接
准部咨如果加引不嫌過驟票價無慮偏枯自可照議
辦理旋又續准部咨議覆御史李映片奏令新商伊厚
堃等援照四千兩定章補足票費等因當經分飭運司

孫翼謀前署運司見署淮揚海道徐文達妥議去後茲據該司道等會詳皖岸票價向係由商因時值高下呈繳並無一定數目若令援照四千兩補足無論新商力難承運卽舊商亦有本重利薄之嫌詳加體察擬就已繳之三十五萬七千一百六十兩按數除零給發一百四十八票准其循環轉運每引仿照鄂湘收票費銀二十兩庶與部文繳足全費與楚岸一律方准領運行銷等語脗合詳請覆奏前來臣查增引一事本以察酌岸銷商情爲主前次請復四萬二千餘引一因銷路尙屬暢旺一因新商聞風踴躍是以將舊額全數規復自去

歲夏間皖省蛟水爲災銷路較滯商情因之觀望與春
間加引時情形不同自應將所增引數量予酌減斯新
引獲轉輸之益舊引無占礙之虞此次該運司等請給
循環一百四十八票計祇給運一萬七千七百六十引
照原奏不及一半之數而票費前定每引十六兩今仿
照鄂湘收繳每引計增四兩核與部議尙屬相符質諸
眾商均無異說除批令挨次起運外理合附陳奉

旨戶部知道欽此

謹按皖岸加一百四十八票以一百票加入北鹽環
運以四十八票加入南鹽環運互見加引卷中

兩淮鹽法志卷七十二

兩淮鹽法志卷七十三

督銷門

鄂岸督銷上

兩湖戶口繁殖甲天下承平時淮鹽引岸楚省稱最自
寇難起川粵北潞鄰私侵灌喧賓奪主久假不歸淮南
鹺綱敗壞極矣咸豐末年長江略通始試行淮鹽於上
游厥後漸推漸廣鄂湘西皖四岸各定票引設督銷局
於漢口長沙南昌大通等處檄監司大員綜其事其要
曰整輪杜搶售也曰板價保商本也於是賈販無躡越
之虞行戶鮮侵虧之弊法良意美誠遠大之模矣然引

地未能全復私梟未能盡絕彼盈則此絀其得失利病已詳於圖說而其創立沿革隨時變通不可無所紀也茲以鄂岸爲首湘次之西皖又次之志鄂岸督銷

咸豐十一年五月湖廣總督官文奏楚省例食淮鹽自咸豐三年粵逆踞擾金陵江路梗阻商賈星散淮鹽片引不至經前署督臣張亮基奏請借食川鹽按斤提課因事屬創始章程未備驟無成效迨至五年臣接任督篆後委荆宜施道荊州同知在宜昌沙市兩處各設局卡於緝私提課諸務設法整理日有起色業將歷年提課濟餉情形按期奏報在案乃自上年川省匪徒滋事井

竈產鹽之地屢被蹂躪去夏以後商賈觀望不前鹽價驟增每斤貴至八九十文及百文以外不等民間苦於食貴且慮蜀寇日久未平井鹽來源稀少無以濟楚食淡堪虞朝夕籌思莫名焦灼查楚北近年整頓水師長江上下分設礮船梭織巡防商船尙可隨時挽運當此楚北鹽缺價昂亟宜乘機利導力籌淮運漸復舊規惟慮淮商復業無期見擬於漢岸招募商販變通試辦據運同銜兩浙試用鹽運副鄭榮封具呈結保職員黃世賢張杰墀情願湊集資本赴淮南辦運引鹽請由臣衙門頒發護照印文齎投兩淮運司查驗令該商販照例

納課辦鹽運至漢岸行銷循照楚北定章按斤完納釐
稅以濟軍餉刻下甫籌淮運能否暢旺尙難預定所有
入楚川鹽應仍照常行銷並行不悖俟淮鹽辦有成效
再行察看情形停止川鹽但期江路通行疏銷暢旺將
見淮綱舊制規復有期不特楚省民食攸賴且淮課日
充

國家收自然之利實於時局大有裨益據代理鹽法武昌
道調補荆宜施道厲雲官議詳請奏前來除行兩淮運
司查照仍俟商辦淮鹽運抵漢岸再將運銷斤數按季
另行咨部外所有籌議由楚招商試辦淮運情形謹會

同兩江督臣曾國藩湖北撫臣胡林翼繕摺由驛馳奏
奉

硃批戶部速議具奏欽此六月戶部議奏伏查湖北武昌等九
府一直隸州所屬五十九州縣向行淮南額引其五十
五萬六千八百餘道自咸豐三年金陵失陷江路梗塞
淮鹽片引不到楚岸前署督臣張亮基奏撥川鹽二千
引因成本過重旋即停止經臣部迭次奏令籌辦設卡
抽稅於五年十二月據該督官文奏報該省於宜昌荆
州兩局抽收川私鹽釐每斤共錢七文合銀三釐五毫
並於武漢各屬設卡抽收潞票等私鹽釐歷經辦理在

案茲據官文以川省匪徒滋事井竈蹂躪商賈觀望不前鹽價驟增且慮川鹽日少淡食堪虞據試用運判鄭榮封結保職員黃世賢張杰墀集資赴淮南辦運引鹽由該督發給護照印文令該商赴淮照例納課辦鹽運至漢岸行銷仍按斤完納釐稅等因具奏前來臣等查淮南通泰場鹽向由揚州所屬儀徵口出江經過江甯安慶一帶運至湖北之漢口鎮分赴各岸行銷自江運阻隔以來楚岸久懸於今幾近十年該督奏請招商辦運淮南官引由江赴楚並令先納淮課仍抽鹽稅係爲籌復舊規濟民裕餉起見自應准其試辦應請

旨敕令署理兩江總督薛煥轉飭兩淮運使將該商等齎到湖
廣總督護照印文查驗明確卽飭令赴場買鹽照淮南
引鹽科則完繳正雜課銀給引放行並將每引照則徵
收正雜課銀各若干另存候撥分晰總散各數卽行報
部查核並飭鹽場各員及胥役人等不准留難需索亦
不准縱庇夾帶如查有前項情弊立即從嚴懲辦該商
領運官引自完納准課後凡遇設立抽收鹽釐各卡局
仍照則完納釐稅不得藉詞抗違其本非抽收鹽釐關
卡卽不准攔阻訛索以利商運至江路尙未平靖據該
督聲稱長江上下皆有礮船梭巡所有商船往來行駛

應飭水師員弁實力巡防妥爲保護毋稍鬆懈謹將臣等遵

旨速議緣由恭摺具奏奉

旨依議欽此

咸豐十一年九月運司喬松年詳遵查淮南鹽務自軍興以後長江梗阻通道不通鹽旣不能按額銷售課卽無從計引完納三四五六等年試辦就場徵課因無成效旋卽停止迨七年七月本司署理運篆會同聯前司酌改設局收稅詳奉奏定每擔計鹽百斤完正稅一錢二分外銷經費三分六擔給大票一張嗣因包大鹽少恐

有夾帶於八年正月詳奉前督鹽憲何改爲九擔給大票一張卽照九百斤徵正稅一兩八分經費二錢七分歷年儘力督銷雖較前略有起色但總因楚西各岸不能上達僅在就近零售銷數無多是以每年奏報稅課僅得二十餘萬兩內外以之儘解各營軍需諸形竭蹶今奉湖廣督憲奏明招商試運南鹽赴楚銷售誠如部議係爲籌復舊規濟民裕餉起見自當恪遵部文督飭印委各員嚴禁需索密查夾帶實力試行以廣招徠惟長江雖有水師保護而儀徵以上閒有賊營阻隔冒險挽運究屬可虞卽如首先應招之張杰墀等業於七月

間齎領護照印文來淮採買初次祇先試運二百五十
票照稅鹽科則計收正稅二百七十兩迄今匝月有餘
其鹽曾否到楚尙無音耗所有該商等已請未運之照
及厥後應招之商瞻顧徘徊均待前檔鹽銷課回以爲
准則如果長江通行無阻銷速利饒自必往來周轉源
源不竭設江路安危靡定無利可圖恐他商聞風難期
踴躍是楚運一事目前尙無把握且沿江及楚省釐捐
核計數目甚鉅加以鹽價水腳等項成本過重溯查淮
南從前運楚鹽本從未有如許之多釐不能減課無從
增將來必須通盤核計從新釐定方能漸復舊制本司

悉心籌議惟有仍照七年奏案每鹽百斤完稅課一錢二分經費三分核實徵收所收稅銀悉解江北糧臺充餉卽楚岸疏通以後軍餉待方殷勢難另款存儲轉於餉需貽誤應請嗣後商人試運楚鹽仍照見辦章程按票徵稅隨時彙解軍需歸入稅課項下一併奏報以歸簡易而昭核實奉札前因除呈覆湖廣督憲並行總局暨通泰分司轉飭各場遵照外合先詳請咨部查照經鹽政曾國藩批釐捐旣多加之鹽價水腳等項成本過重楚商辦運官引亦恐江路中梗目前尙無把握未便以試行伊始遽請改復課額應准仍照咸豐七年奏

案按票徵稅彙入淮南稅課項下悉解糧臺充餉毋庸
另儲報撥以歸簡易而廣招徠仰候分咨戶部暨湖廣
閩督部堂查照

同治二年十一月鹽政曾國藩釐定淮鹽運楚章程第一
條泰州設招商局第二條兩湖設督銷局第三條四處
截角查私第四條加重鄰私釐稅第五條計算本利各
款第六條補完各處釐金第七條商運官運畫一第八
條沿途並無艱險

謹按以上八條詳淮南票法新章茲僅標其目以存
梗概其鄂岸督銷局設漢口鎮餘與他岸略同

同治三年正月湖北布政使厲雲官呈湖北督銷開局事宜
一開局後新鹽未到所有在岸在途舊鹽統行歸局發售查章程內開已完鹽課之鹽如何補提餘利充餉由局員核明市價稟明辦理見在售價每擔庫平銀四兩一錢照定價四兩所增無多應請免提餘利祇令呈繳局費三錢以示體恤
一在岸舊鹽所到先後楚釐局原有簿冊可查卽照其次序挨售以後淮鹽到岸無論新票舊照報到立派巡河驗明填冊總以驗船爲定不以投號爲憑以杜虛報搶先之弊其同日到岸之船則以報到先後爲序
一楚釐每斤捐釐錢九文半

每引合足錢五千七百文錢價較昂應合庫平銀四兩八錢四分五釐今新章改爲每引繳銀四兩二錢計減銀六錢四分五釐議請將在岸在途舊鹽仍照每斤九文半完繳俟新章之鹽到岸再照新章繳銀以示區別

一章程內所刊每擔售銀四兩係指至賤至減而言並非定價今市價每引售庫平銀四兩一錢應卽諭令各鹽行照此一律發售不准暗有高下俟新鹽到日再行由局定價懸牌諭示其局中定價總按銷市暢滯隨時酌定一面出示一面申報

一楚岸鹽行售與水販向皆賒欠有遲至二三月者其所用銀色尤爲低潮今

諭令各鹽行一律改爲庫平足色如有通融短欠惟鹽行是問 一各鹽行已據開送草冊見令出具互保切結再行造報如有短欠互保之行分賠 一局中官稱概用曹砝已由局製造較准發用 一鹽法以緝私爲首義准鹽川鹽均有夾帶之弊容會同司道另議緝私章程稟明辦理經鹽政曾國藩批第一條舊章之鹽係先釐後鹽且楚釐須繳錢文成本略重見每百斤祇售四兩一錢所得餘利無多准免提利以示體恤第三條新鹽到岸應完楚釐前經本部堂咨明兩湖督部堂湖北撫部院鄂湘應抽准釐定章時係照市價以錢合

銀嗣後無論銀價漲跌總照初次核定銀數收解以昭畫一在案新鹽到楚必須遵照刊章每引收楚釐銀四兩二錢其各處之釐統照刊定銀數收解以取信於商販第四條新鹽售價准由該局隨時察看銷市酌定懸牌但每引至賤不得少於刊章二十四兩之數是爲至要第八條另議杜絕川淮夾帶之弊俟章程稟到再行酌奪其餘四條均屬妥協

同治三年正月湖北督銷局道員杜文瀾稟呈酌辦事宜六條 一加稅鄰私奉發章程川鹽於荊州加釐錢每斤八文以五文歸淮三文歸鄂查川鹽自宜昌到漢口

每斤向抽錢十七文爲數已多驟加八文似嫌喫重擬請每斤先加抽錢五文於宜昌抽二文荊州抽三文均於四月初一日起加抽所收釐錢皖鄂平分濟餉卽由荊宜鹽局附收不另設局以省糜費仍隨時察看如川鹽來路較旺再行酌加以重引地 一另刊稅單奉發稅單係鹽政單銜見擬不分皖鄂加抽五文已另刊會銜稅單蓋用湖北鹽道關防發局填用如鄰私違抗不領稅單擅侵引地截拏究辦至淮鹽水程向定限期距漢岸在一千五百里外者限三箇月一千里至一千五百里者限兩箇月數百里者限一箇月限滿作爲廢紙

應請照此於水程內加蓋戳記以示限制、一停設分局原定章程因商販在下游發售於武穴地方設立分局仍歸總局兼管係爲便販起見見查下游分賣流弊極多難以保價已稟准毋須設立分局遵卽通飭下游各州縣一體示諭凡有鹽船過境概不准停留賣鹽如違拏究以杜售私盜賣跌價之弊 一緝私示限湖北省向於武穴白湖渡設立局卡專收無票淮鹽釐課原屬化梟爲官之意見在規復淮綱則無票之私必應拏辦第恐小販人等未盡周知已另文詳明通飭示諭自四月初一日起如再查有無護照淮鹽到岸卽以私論

將鹽入官治以應得之罪 一截查皖鹽奉發皖鹽護
照祇應運至大通爲止卽有轉運者亦僅准行於皖省
境內見在轉運之鹽已侵入楚境在武穴以上發售每
擔祇售銀三兩五錢殊於保價有礙擬請飭知武穴局
卡嗣後凡有皖鹽護照概截留不准過卡儻敢不服盤
查稟明拏辦 一稽查鹽行漢口鹽行連本年新開二
家共十二行內有一行停貿尙未繳帖已查明的名年
歲籍貫造冊呈核並令出具儻有侵虧課款客本願甘
究治互保各行分賠切結存局備案經鹽政曾國藩批
第一條加稅鄰私應如所議於四月初一日起先於宜

昌每斤加抽二文荊州每斤加抽三文所加之釐淮楚各半分用如加收後川私仍前充斥再當量予酌加不得以加收五文遽爲定案所請由荊宜鹽局附收事屬可行惟須由該局選派委員二人前往監收令將收數按旬具報以重稽查第二條稅單改用雙銜准其照辦水程期限亦如所擬填發第三條分局旣停所有淮鹽自應全歸漢局出售下游一帶斷不准顆粒私售以杜漏釐盜賣之弊第四條無票淮私自應嚴拏究辦已於另詳內批示第五條皖鹽護照運至大通卽行收繳其由大通轉運之鹽係發大通局水程祇准在於皖境行

銷豈容侵灌楚界候卽派員前赴武穴設卡專司截角
兼查無照准鹽分別截留拏辦皖岸水程本部堂未經
刊發並候札飭大通局檢式呈核斟酌妥善另行飭遵
第六條各鹽行旣據查明均係領帖在前除停買之黃
長發外其餘俱准代客買賣務令恪遵局規一律以見
銀交易仍由該局嚴加約束隨時稽察如有拖欠侵虧
及暗跌售價情弊立提究辦

同治三年二月湖北督銷局道員杜文瀾等詳湖北省之
武穴及白湖渡等處地方向設局卡專收無票准鹽釐
課以濟軍需見奉頒發新章第三條內開嗣後准鹽運

楚如無本部堂護照及未按卡截角者一概不准過卡
如有偷漏到岸卽照私販拏辦本司道等遵卽轉飭各
局卡查照辦理惟念無票准鹽運行已久見在新定章
程恐下游水販人等尙未周知遽照私販拏辦似不足
以折服其心本司道等公同酌議擬請示定限期俾商
民有所遵守所有本年三月以前運到無票准鹽各該
局卡仍照舊章飭令完釐自四月初一日起卽將無票
准鹽釐課一律停止經鹽政曾國藩批准照辦

同治三年七月運司郭嵩燾詳奉鹽院札據湖北鹽法道
詳據楚省商販同順源號職員唐廷樞稟報試辦准鹽

一百引雇用曹鳴春船承裝行抵黃州所屬團風地方
遭風淹消稟懇轉詳免釐補運等情查淹消引鹽若概
准免釐補運卽難保無捏報必須明定章程以杜弊端
劄司查明淹消成案及見在釐課數目應否准其免釐
補運之處妥議章程詳候核奪等因本司查自經咸豐
三年賊擾揚城司中成案多半焚燬所有商鹽淹消補
運之案道光十年間曾經色前署司詳奉前督鹽憲陶
批所議鹽船淹消責成地方官會營查究詳由鹽道訊
無捏飾結案後再行補運似足以昭核實等因嗣經俞
前司復詳商鹽淹消有關商本擬請以已結案未結案

分別准其買補以足額引而示體恤詳定商鹽到儀解
捆後由船埠行攬裝江船俟鹽包全行上載商廝偕同
江船戶赴南掣廳衙門當堂領付商給水腳銀兩謂之
圓契誠恐姦商呈欠水腳以鹽作抵致滋流弊開行後
按照行銷省分路途遠近填給水程限票到岸後報各
省鹽道衙門呈驗以防在途逗遛致有偷爬盜賣情事
儻有在途遭風淹消或被搶劫或本船不戒於火或因
鄰船失慎延燒均卽飭令押運商廝當卽逕赴失事地
方官衙門報案該管地方官先詣失事處所勘明屬實
提齊本船商廝及舵工水手人等分別訊供如果審明

真實淹消並無偷爬盜賣捏報情事卽由該地方官繪圖詳報定案由本司轉報憲臺衙門發給院印護批准其免課補運如遇有引目失落或致損人命等事一時結案無期由失事地方官於年終時勘詳彙冊報明憲臺先行給批補運不准免課如審有船戶盜賣卽著落船戶賠補商課或本商或商廝串同船戶盜賣中途有意鑿漏放生等情概行不准補運仍提經過埠行治以濫雇濫裝之罪迨至咸豐三年長江梗阻運道不通試行稅法由東壩借道運鹽從無有水販報到淹消之案見在大江通行運鹽無阻自儀達岸江面二千餘里風

信靡常難保無淹消情事奉札妥議章程本司核查見存舊案就道光十年色前署司詳奉批定章程並俞前司續議免課補運俱已周妥惟從前商運僅完課銀捏報風火守候勘訛亦多羈累且不免審實扣補治罪之條自能杜其姦心今自軍興以來鹽務卡釐桶捐等項爲數不少成本轉重難保無姦商船戶僥倖萬一復啟捏報之風本司擬以長江猝遭風火失事應分別確核辦理如片板無存引目未失訛明商廝船戶如何遇救得生供證確鑿准其免捐免課給照補運或遭風擱淺桅舵損壞船身大傷鹽盡淹浸或被搶劫但許免捐不

准免課一體補運或僅擱漏碰損鹽未盡淹以及本船失火卽難保無偷賣挖漏捏報情弊但准補運不免捐課其餘悉照舊章辦理似此量分等差似於恤商杜弊課稅餉需兩無窒礙是否有當合乞示遵再唐廷樞一案應否俟勘訊虛實照章辦理並祈核飭道照經鹽政曾國藩批如詳辦理唐廷樞一案見據湖北鹽道詳轉據黃岡縣詳覆差獲藍明春等訊錄供情委係船被沉沒鹽盡淹消應照章准其免捐免課給照補運已批飭遵照矣

同治三年九月兩淮鹽政曾國藩札湘岸銷數甚暢鄂鹽

爲川私侵占頗形壅滯自宜將鄂岸之鹽酌量轉運湘岸統歸湘局出售以符定章而廣銷路

同治三年九月湖北督銷局道員杜文瀾等詳舊章淮鹽於咸豐十一年五月內奉兩湖督憲飭於漢口設立票鹽釐局委員辦理本年二月內本司職道等奉委在漢設立督銷淮鹽總局因恐新舊牽混所有舊章引鹽仍歸原立之票鹽釐局專收在案茲查舊鹽已經停運漢岸所存無多本司職道等會商將前設票鹽釐局於九月初十日詳明裁撤尙有未銷舊引歸併督銷局辦理經鹽政曾國藩批允

同治三年十月湖北鹽法道盛康等詳據商販乾泰稟稱
竊商承運楚岸新章鹽二千四百三十引分裝十船內
吳益順船原裝三百五十引內有安鹽五十引譚茂發
船原裝二百十引內有安鹽九引共計安鹽五十九引
查湖北崇陽通山通城三縣素食安鹽向來楚岸章程
凡安鹽到岸例准另輪開售不入大輪挨賣緣安鹽行
銷祇此三縣地方並不礙梁鹽地步茲商搭載安鹽五
十九引請照章先行提售以便民食等情查安鹽係屬
碱片俗名鍋巴鹽其質甚堅如杯如盎外黑內白崇通
三邑耕山之民專買此鹽貫以草繩繫之帶間以代蔬

菜別邑皆不能合銷是以綱鹽時提開另售以免占礙
近年以來商人於泰州將碱片捶碎驛和以致鹽色愈
劣茲該商販將碱鹽另包不復驛和於整頓鹽色甚屬
有益所請提開另售與舊章相符於梁鹽銷數亦無窒
礙惟以後所運碱片諒必不止一戶如欲另行提售必
須嗣後凡有全包碱鹽一律提開仍各自挨售以免兩
有格占經鹽政曾國藩批碱片安鹽既不合通市銷路
如詳另行挨售仍由該局逐包弔驗以杜驛越而免淆
混

同治四年四月鹽政曾國藩札運司湖北行銷川私自荆

州宜昌加稅之後川販暗將川本減跌仍復源源而來
當經本部堂咨請湖廣閣督部堂將川稅再行酌加疊
接文函均以鄂省需餉浩繁皆賴川鹽釐金藉資濟助
若再行加抽川販禁絕實於楚餉有礙等因本部堂查
鄂中軍餉以川釐爲大宗係屬實在情形不能不統籌
兼顧川稅旣不可再加自應暫行從緩惟查上年川鹽
到數以淮南六百斤計引不下二十萬引之多淮南祇
銷新引三萬餘引不及川鹽十分之二若不設法疏通
則已運者益形壅滯卽未運者難廣招徠於淮綱引課
亦大有窒礙籌思再四惟有量減鹽釐酌輕售價仿照

西岸每百斤售庫平寶紋三兩五錢庶可收敵川暢淮之效見經本部堂與官爵閣督部堂往返函商議定於鄂省每引向收淮釐四兩二錢項下減去一兩八錢合每百斤減輕三錢本部堂亦於安慶糧臺應收淮釐內亦減一兩二錢合每百斤減輕二錢統計共減五錢以期水販本輕開通淮鹽銷路除附片具奏並咨湖廣督部堂湖北撫部院一體飭遵暨札督銷局遵辦外合行飭司知照

同治四年閏五月湖北鹽法道盛康等申復遵札減輕淮鹽售價並呈示稿一案細釋前呈示稿原載每鹽百斤

售價四兩減去五錢行用一錢二分減去一分五釐共
減去銀五錢一分五釐茲奉前批牌價減去五錢行用
一錢五釐每百斤共減去六錢五釐查前定行用每百
斤收銀一錢二分今若減去一錢五釐僅餘銀一分五
釐應請仍照原稟每鹽百斤准減行用一分五釐之數
以示體恤經鹽政李鴻章批允

同治四年六月署鹽政李鴻章批湖北督銷局稟查漢岸
儲鹽倉棧地皆濱江據稟見在漢江兩水並發已平岸
腳萬一水勢漫溢倉棧被淹非但商本盡歸烏有卽鹽
釐爲數甚鉅於軍餉所關匪細自應趕緊設法預爲之

備所請提輪銷售固非存船待售之商所願但事關大局況各商提售之銀並不發給擬先由局生息以津貼到輪各船住日尙屬平允准如所稟辦理本署部堂尤有慮者商鹽十餘萬包卽准提售照漢岸目前銷市至速亦非一月不能售訖而水患起於倉猝尙恐猝辦不及應令各商多備船隻如果江水陡漲卽將鹽斤趕緊上船其多費水腳等項俟水平後或由官貼或由棧戶分認再行從長計議仰該道隨時察看情形督飭各商嚴密保護總求鹽不被淹課歸有著不得因有此批卽行搶跌爭賣不復雇船備救自貽伊戚也

同治四年八月湖北督銷局道員黃家駒稟竊職道前以
引銷漸暢存鹽無多稟請札飭大勝關趕緊掣驗催令
迅速上駛業蒙分別札飭在案近來到岸鹽船仍屬寥
寥揆厥情形多由船戶沿江逗遛藉滋弊竇是以盜賣
短包之案層見迭出亟應派員前往梭巡催提不容停
留惟卑局僅存餉船二隻常川解課尙不敷用若另雇
江船實難期其迅速懇派撥礮船二號來鄂以便摧提
鹽船兼爲沿江巡緝之用經鹽政李鴻章批據稟請撥
礮船二號爲催鹽巡緝之用事屬可行惟礮船到局後
卽就近由該局畫給口糧以便調遣仰候咨明黃軍門

酌派

同治四年八月湖北鹽法道盛康督銷局道員黃家駒詳報水販義仁興備貨赴鄂買運碱鹽赴湘銷售一案奉批湘省碱鹽缺少該水販義仁興稟請由鄂買往湘岸平江融銷事屬可行惟應將應完鄂湘各釐全行繳局由該局給文押運指明全係碱片專運平江不得以別色梁鹽夾帶亦不得越赴他岸行銷致有占礙茲據該販稟稱查湘岸碱鹽銷路較廣鄂存碱鹽尙積三千餘引若待崇通兩邑買運卽屬暢銷亦需時日不惟課項久懸商本亦難輪轉惟有遵批繳釐將商花名原裝翦

真記船碱鹽三百九十八引計三千一百八十四包內
除船戶少交鹽一百二十三包另行賠補外淨鹽三千
六十一包又譚永詳船碱鹽一百三十引計一千四十
包分船運赴平江濟銷按照刊章繳完釐課伏思釐從
引出轉鄂運湘未能一鹽兩釐成本加重致礙行銷卽
經在鄂全繳則湘釐應請免重納茲其鄂鹽運湘五百
二十八引每引全繳八兩九錢八分共計應繳釐課銀
四千七百四十一兩四錢四分如數稟呈核收委員督
押平江地方出售並請給發護鹽官件及免釐文書以
便運售經鹽政李鴻章批查判定章程湖北之鹽僅由

湖北經過不能全收九文半之釐應以二文半歸鄂以
七文歸湘今碱鹽轉運平江卽與湘鹽過鄂無異按原
釐九文半鄂派二文半係十分中之二分六釐三毫零
今減爲每引釐銀二兩四錢應照此分派湖南分釐銀
一兩七錢六分八釐五毫湖北分釐銀六錢三分一釐
五毫仰卽將此項所收釐銀照數分解並移湖南督銷
局湖北牙釐局知照

謹按後有鄂商許公益吉興祥請以碱鹽運江西通
融接濟經鹽政批駁蓋以西岸完釐章程與鄂殊也
同治四年九月湖北鹽法道盛康督銷局道員黃家駒報

查接管卷內稟定條陳內開漢口鹽行連新開二家共
十二行內有一行停貿尙未繳帖已逐一查明的名年
歲籍貫造冊齎核並令出具儻有侵虧課款客本願甘
究治互保各行分賠切結存局備案本年八月間漢市
不戒於火元泰鹽行燒毀一空卑局知其受累甚重追
收釐課不得不嚴本月初一日據司月鹽行胡鼎豐等
公同具稟茲當應兌之期元泰領事之戴藹亭避匿無
蹤查該行欠繳川鹽釐課另案辦理外計應繳淮鹽釐
稅銀七千六百兩又應兌商本銀一萬五千餘兩行等
情願遵案攤賠請限公繳惟查戴藹亭素在上海立莊

恆生福號買賣貨物又在武昌縣屬葛店地方開立隆泰雜貨店又在本鎮利濟巷五彩河街兩處製有房產均屬鹽行抽出銀兩及各處鋪販欠交元泰鹽銀應請分別移行各地方官查封變抵追繳鹽價俾舒行等攤賠之苦當卽傳集鹽行胡鼎豐等著令先將元泰應繳釐課商本分爲九月十月兩限換具各行公票如期呈繳不准稍有帶欠並由局委員籤差分途查封戴藹亭號店貨物所製房產變價歸抵並將戴藹亭嚴密查拏獲案究辦以重課項而肅鹺政查鹽行資本參差賢愚不一事後追賠終非妥善除俟九十兩月限期銀兩如

數收清再由職道妥議章程設法兌見

同治四年十一月湖北督銷局道員黃家駒等稟接管卷內江蘇試用知縣張遂生領運公盛和張公興楚岸票鹽應完釐課陸續扣抵尙有公盛和一票按鹽提課計少九十四引五分欠繳釐課庫平寶銀一千一百六十兩四錢六分未據補交經前杜道飭催該員趕緊補繳職道家駒接辦後又兩次移催迄今已逾兩月未據繳解惟此項銀兩攸關課稅未便再任延欠思該員領運之時自有確實原保耽承若不稟請究辦似不足以昭炯戒經鹽政李鴻章批仰候札飭淮運司會同楚鹽招

商局卽將張遂生查詳參革提案迅究並提的保立限
追賠以重課項而儆官邪

同治四年十二月鹽政李鴻章批湖北督銷局稟漢鎮鹽
行一案據請漢鎮分銷事宜此後責令連環互保之十
家經理不准再行添設係爲保固離藩起見准如所稟
辦理惟行欠盈千累萬終屬可虞屢經批令售賣見銀
未據遵辦見在銷數日旺必將課本逐漸提早收楚辦
到銀鹽兩交則旣可杜水販之脫空並可免同行之賠
累於各鹽行亦甚有裨不獨淮南受益至戴藹亭見逃
何處仰仍嚴密訪拏照例懲辦勿任逍遙法外其元泰

行帖卽送湖北牙釐局註銷

兩淮鹽法志卷七十三

兩淮鹽法志

卷七十三

督銷門 鄂岸督銷上

三